

Imaatigut ajunaarnernik, isumannaallisaanermik misissuinerit pillugit inatsimmik Kalaallit Nunaannut atuutilersitsinissaq pillugu peqqussummik, Namminersorlutik Oqartussat akuersissuteqarnissaannik Inatsisartut aalajangiiffigisassaattut siunnersuut (Isumaginninnermut, Suliffeqarnermut, Ineqarnermut, Attaveqaasersuutinut, Isorliunerusunullu Naalakkersuisoq)

Siullermik Naleqqamiit Naalakkersuisut qutsavingerusuppagut Imaatigut ajunaarnernik, isumannaallisaanermik misissuinerit pillugit inatsimmik, Naalagaaffik suleqatingalugu saqqummiussimmata.

Inatsisip siunertaa uaniippoq, Imarsiornermi Umiiarnerit pillugit Ataatsimiitsitaliap, imaatigut ajutoortoqarsimatillugu misissuilluarsinnaaneranik qulakkeerinnittoq. Pingaarnertullu paasiniarluarnissaa, ajutoortoqarsimatillugu qanorpiaqqissaaq pisoqarsimanersoq. Imaanngittoq eqqartuussinerlutullusooq pisoqassasoq, naamik, pingaarnerpaassaaq pisoq qanoq ilinniarfusinnaanersoq, siunissami ajutoortoqaqqinnginnissaanik iliuusaasinnaasunik.

Soorunami ajutoortoqarsimatillugu pineqaatissiinerit, akisussaasut, taarsiivigitittussat allallu qulaajarneqartarput. Kisianni uani inatsimmi tunngaviuvoq paasiniaanerit siunissamut ilinniutaasinnaaneri. Ilinniutaassappatalu pineqartut toqqissillutik paasiniaanermut ilaasinnaanissaat. Assersuutingalugumi, umiarsuaroq kivivoq – qanoq kiviva, umiarsuup naalagaata akisussaaffini naammassivaa, umiarsuarmi atugassarititat naammaginarsimappat?

Naleqqamiit inatsisinik nalimmassaaneq ajunngitsutut isigaarput, tassami nunarsuarmioqataanitsinni nunani tamalaanillu tikinneqartarnerput annertusiartuinnartoq, soorumami inatsisit nalimmassarneri pissusissamisoorsoraagut. Folketing- imummi qineqqusaarnerit kingulliit taamak aamma innersuussisarput. Danskit akisussaaffitsik aamma qaqittariaqaleraat, Inatsisit, akisussaaffillu tiguneqarnissaannut piareersarlugit.

Naleqqammiit pingaartipparput immitsinnut aallaaviginissarput, sineriappullu tamaat ineriartortinnissaa. Taamaammat inatsit una Nunatsinnut aamma nalimmassarluagaanissaa pingaartipparput aammalu imartarput Danmarkimiit allaaneroqisoq eqqumaffigjuaannassaaq. Nunarput, imartarput siullertut issittumiippoq, isorartoorujussuuvoq. Atuisut, talittarfiit, ilulissat, ikkarluit nalunaarsorsimaneri il. il. allarluiinnaasinnaapput.

Imarsiornermi Umiiarnerit pillugit Ataatsimiititaliap pisinnaatitaaffigivaa, angallatit 15m ataallugit angissusillit misissuiffinginnissaanik aalajangersinnaalluni, taanna ajortuinnaangilaq, kisianni eqqumaffigisassaavoq, tassami nunatsinni aalisariutit amerlasuut, angallatit, takornariartaatit 15m ataallugu angissusillit atugaangaatsiarput. Tamannalu eqqumaffisatut Naleqqamiit taarusupparput, nalilersorneqaqqullugu ataatsimiititaliami.

Ajutoortoqarsimatillugumi pisup ilinniutiginnissaa pingaaruteqarnerpaasimappat, aamma nunatsinni ajutoornerit taamaattut misissorneqartarnissaat pingaaruteqangaatsiarsinnaapput.

Naleqqamiit Kalaallit salliutinnissaat pingaartipparput, taamaattumik Umiiarnermut ataatsimiititaliaq Kalaallinik aamma inuttalersorneqartariaqarpoq, tamannalu Naalakkersuisut qulakkeerniartariaqarpaat pitsaanerpaamik. Minnerpaamillu umiartornermut ilinniarfimmut ataqatigiissaarinissaq aamma pisariaqarsinnaassalluni.

Naleqqamiit aamma oqaatigissuarput, Kalaallit Nunaani atuisut Kalaallisut oqaluttuummata - Umiiarnermullu ataatsimiititaliaq saqqummiussaqaartillugu, eqqaamassavaput, Kalaallisut oqaatsivut pisortatigut pingaarnertut inissisimasussaammata, nalunaarusiallu pinngitsooratik oqaatsigut atorlugit atuarneqarsinnaanissaat qulakkeerneqassasoq.

Naleqqamiit aalajangiiffissatut siunnersuut, Kunngip peqqussutaa taperserparput. Inatsillu nalunaaruterpaalussuarnik ilaqartussaataasooq, isumaqarpugut Inatsisinut ataatsimiititaliamut aappassaaniinginnerani suliarineqassasoq.

Qujanaq